

Xi³ ma³jao²-ni³ xon⁴xi³ pa²stro⁴Pablo
qui³squi³-le⁴Timoteo

Pablo si¹ti²nta³

¹ An³ nia¹³ Pablo, pa²stro⁴-le⁴ Jesucristo nca³ c⁷oa⁴-s⁷in² coan³me³-le⁴ Ni³na¹. An³ nia¹³ pa²stro⁴ xi³ t⁷a³ts⁷e⁴ je² cjoa⁴vi³jna³chon³ xi³ Ni³na¹ qui³si³s⁷e³nqui³, c⁷oa⁴ xi³ Cristo Jesús tsjoa¹. ² Ti²cji³-le²³ Timoteo ⁷nti¹-na⁴ xi³ tsjoa³que⁴. Ni³na¹ N⁷ai³-na¹ cao⁴ Jesucristo Nai³-na¹ ca²ta³tsjoa¹-li² cjoa⁴nta³, ca²ta³ma³ma⁴que³-li², ca²ta³si¹qui³njen³nch⁷an¹j³in³ ni⁴ma⁴-li⁴.

C⁷oe¹ en¹-na¹ xi³ t⁷a³ts⁷e⁴ Nai³-na¹

³ Tsjoa³-le⁴ cjoa⁴nta³ Ni³na¹, je² xi³ c⁷oa⁴-s⁷in² si¹chjen¹-na³ nca³ tsje³ tj³in¹ cjoa⁴fa³ai³tsjen³-na⁴ jo³-s⁷in² ji²tjo⁴jian³ cho⁴ta⁴jchi¹nca³-na⁴. Li²coi³ cha³j³in³-na³ ni⁴chj³in³ nca³ ni⁴tjen⁴ nca³ si³cja³ai³tsjen³-le²³ nca³ v⁷e³ts⁷oa²³. ⁴ Me³-na³ nca³ scoe³-le²³, nca³ fa³ai³tsjen³-na³ nta¹xcoin³, jme¹-ni³ nca³ tse³ cjoa⁴tsjoa³ s⁷e⁴-si¹ni³na³. ⁵ Tj³in¹j³in³-na³ jo³-s⁷in² nca³ ña³qui³ cjoa⁴qui²xi⁴ ma³cjain¹-li², nca³ c⁷oa⁴-s⁷in² ti¹tjon² coan³cjain¹-le⁴ na⁴jcha¹-li⁴ Loida cao⁴ na⁴-li⁴ Eunice. C⁷oa⁴²-ti⁴ n⁷ion¹ nta³ ⁷ve³ nca³ ma³cjain¹-li². ⁶ Xi³ coi³-vi⁴ si³cja³ai³tsjen³-le²³ nca³ c⁷oe¹tse³-sai³ je² cjoa⁴tjao²-le⁴ Ni³na¹ xi³ je³ti¹jna³j³in³-li² nca³ an³ tsa³ca³son²-le²³ ntsa⁴. ⁷ Ni³na¹ li²coi³ qui³tsjoa³-na¹ cjoa⁴jcon³. To⁴c⁷oa⁴-s⁷in² qui³tsjoa³-na¹ nca³n⁷ion¹, cao⁴ cjoa⁴tjao²cha³, cao⁴ cjoa⁴fa³ai³tsjen³ xi³ nta³ fi²cao⁴ yao³-na¹. ⁸ Coi³ cjoa⁴ a³li² ma³soa³-j³in²li² nca³ c⁷oi⁴ en¹ xi³ t⁷a³ts⁷e⁴ Nai³-na¹, ni⁴t⁷a³ts⁷an⁴-j³in²³ nca³ cjoa⁴n⁷ain³ ti²jna⁴ xi³ t⁷a³ts⁷e⁴ Nai³-na¹. To⁴sa³ c⁷oa⁴-ti⁴ j³ chja⁴ai²³ cjoa⁴n⁷ain³ xi³ t⁷a³ts⁷e⁴ je² en¹nta³ t⁷a³ts⁷e⁴ Cristo, jo³ tj³in¹ nca³n⁷ion¹-le⁴ Ni³na¹. ⁹ Je² xi³

tsa³c⁷a³sje³ntjai²-na¹, xi³ qui³nchja⁴-na¹ xi³ t⁷a³ts⁷e⁴ xa¹tsje³-vi⁴. A³li² tsa² c⁷oa⁴-s⁷in² va³quin²-le⁴ xa¹-na¹, to⁴je² xi³ c⁷oa⁴-s⁷in² coan³me³-le⁴ cao⁴ cjoa⁴nta³-le⁴ xi³ qui³ts⁷ai²-na¹ cao⁴ Cristo Jesús jo³ sa³nta³ ti¹tjon² nca³ to²ts⁷in³-le⁴ cjoa⁴. ¹⁰ Nt⁷ai⁴-vi⁴ je³coan³tsen³ nca³ ja³ai³ c⁷a³tsen³ xi³ tsa³c⁷a³sje³ntjai²-na¹, Jesucristo, xi³ tsa³cja³a¹xin² cjoa⁴vi³ya³. To⁴t⁷a³ts⁷e⁴ je² en¹nta³ xi³ t⁷a³ts⁷e⁴ Cristo qui³si³c⁷a³tsen³ cjoa⁴vi³jna³chon³ xi³ ni⁴c⁷ia³-jin² cjoe⁴t⁷a³. ¹¹ Xi³ t⁷a³ts⁷e⁴ je² en¹nta³-vi⁴ c⁷oa⁴-s⁷in² qui³s⁷e³ne²-na³ nca³ nchja²ya³, nca³ pa²stro⁴ ma³, nca³ maestro ma³-le⁴ cho⁴ta⁴ xi³ li² judío-jin². ¹² Coi³ cjoa⁴ c⁷oi⁴-s⁷in² ti²fa³a³-nia³ cjoa⁴n⁷ain³-vi⁴, to⁴nca³ li²coi³ ma³soa³-na³ nca³ ⁷ve³-nia¹³ Cristo xi³ je³coan³cjain¹-na³ t⁷a³ts⁷e⁴. Ña³qui³ tjin¹j³in³-na³ nca³ to⁴je²-sa³ xi³ tjin¹-le⁴ nca³n⁷ion¹ nca³ c⁷oe⁴²tjao² xi³ an³ qui³sca³ni²-le⁴ sa³nta³ c⁷ia⁴ ni⁴chjin³-ve⁴. ¹³ Nta³ t⁷e²j³in³-ta³coin²³ jo³ tso² je² en¹ xi³ nta³, xi³ an³ qui³no²⁷ya²-nai¹³. T⁷e²j³in³-ta³coin²³ jo³-s⁷in² nca³ ma³cjain¹-na¹, c⁷oa⁴ jo³-s⁷in² nca³ tjao²cha³² nca³ ti³yo³coa⁴² Cristo Jesús. ¹⁴ Xi³ to⁴t⁷a³ts⁷e⁴ je² Espíritu Santo xi³ ti¹jna³j³in³ ni⁴ma⁴-na¹, nta³ t⁷e²jna³tjoai²³ je² xi³ qui³cha³ni²-li². ¹⁵ Je³⁷yai³ je²-vi⁴ nca³ qui³tsjion³-na³ nca³ts⁷i³ xi³ tjio¹ ya⁴ Asia. Ya⁴ tjio¹j³in³-le⁴ Figelo cao⁴ Hermógenes. ¹⁶ Je² Nai³-na¹ ca²ta³ma³ma⁴que³ cho⁴ta⁴ xi³ ts⁷e⁴ nt⁷ia³-le⁴ Onesíforo. Cjai¹nca³ ncjin² c⁷a³ qui³si³c⁷e¹jna³con³-na³. Li²coi³ coan³soa³-le⁴ nca³ cjoa⁴n⁷ain³ ti²jna⁴. ¹⁷ To⁴sa³ c⁷ia⁴ nca³ ji³cho² Onesíforo ya⁴ Roma, cjai¹nca³ xi¹ti¹ya³ tsa³ca¹sjai³-na³. Coan³sjai³-le⁴. ¹⁸ Je² Nai³-na¹ ca²ta³ma³ma⁴que³ nca³ je² c⁷ia⁴ ni⁴chjin³-ve⁴. A³li² to⁴c⁷oa⁴cji³ nta³ tsa³ca³sen¹cao⁴ ya⁴ Efeso, ji³ ni¹³ xi³ nqui²sa⁴ nta³ ⁷yai³.

2

Jo³-ni³ tsa² so³nta²do⁴ xi³ nta³ fi²t⁷a³-le⁴ Jesucristo

ca²ta³ma³²

1 Ji³ n²ti¹-na⁴, ch⁷a⁴sjai³ nca³n⁷ion¹, nca⁴ Cristo Jesús tsjoa¹-li² cjoa⁴nta³. 2 Je² xi³ qui³no²⁷ya²-nai¹³ nqui³xcon⁴ testigo xi³ ncjin² ma³-ni³, je²-vi⁴ t⁷e²ne²-lai⁴ cho⁴ta⁴ xi³ tjio¹jnc³con³, xi³ c⁷oa⁴-ti⁴ coan⁴-le⁴ coa⁴co²ya³-le⁴ xi³c⁷a³. 3 C⁷oa⁴-ti⁴ ji³ chja⁴⁷ai²³ cjoa⁴ñ⁷ain³, jo³-ni³ tsa² so³nta²do⁴ xi³ nta³ fi²t⁷a³-le⁴ Jesucristo. 4 Ni⁴jnc³-jin² xi³ so³nta²do⁴ tso²⁷va³, tjo³⁷n²e³-le⁴ nca³ ca³ni¹j³in³ yao³-le⁴ cjoa⁴ xi³ tj³in¹ son³⁷n²e³, jme¹-ni³ nca³ nta³ c⁷oe⁴²-ni³con³ je² xi³ cjoa⁴so³nta²do⁴ qui³tsjoa³-le⁴. 5 C⁷oa⁴-ti⁴s⁷in² je² xi³ si¹sca¹ li²coi³ si⁴²qui³njen³ chji¹-le⁴ tsa² tsi² nta³ si⁴²sca¹, jo³-s⁷in² xi³ cjoa⁴qui²xi⁴. 6 Je² cho⁴ta⁴ xi³ n⁷ion¹ nta³ si¹xa¹ cjai¹nca³ ma³chjen¹ nca³ ti¹tjon²-cjoa²la² si¹xa¹, jme¹-ni³ nca³ c⁷oa⁴-s⁷in²ni³ c⁷oe⁴²xco¹ ntje⁴-le⁴. 7 Cho¹son²-ni³lai⁴ jo³ xin³-le²³. Je² Nai³-na¹ si⁴²cho⁴ya³-li² nca³yi³je³. 8 Ti⁴cja³⁷ai³tsjain³ t⁷a³ts⁷e⁴ Jesucristo xi³ ji³n²choa³-ni³ ntje⁴-le⁴ David. Ja³⁷a²ya³j³in³-ni³le⁴ c⁷en³ jo³ tso² je² en¹nta³ xi³ nchja²ya³. 9 Xi³ t⁷a³ts⁷e⁴ je² en¹nta³-vi⁴ ti²fa³⁷a³ cjoa⁴ñ⁷ain³ sa³⁷nta³ nto⁴ya¹ jo³-ni³ tsa² cho⁴ta⁴ts⁷en⁴. To⁴nca³ je² en¹-le⁴ Ni³na¹ li²coi³ s⁷e³chjoa²-le⁴. 10 Coi³ cjoa⁴ nca³yi³je³ jcho¹cjoa⁴-na³ xi³ t⁷a³ts⁷e⁴ je² cho⁴ta⁴ xi³ qui³tjo³j³in³, jme¹-ni³ nca³ c⁷oa⁴-ti⁴ je² coi⁴tjo³ntjai²-si¹ni³ xi³ to⁴t⁷a³ts⁷e⁴ Cristo Jesús cao⁴ cjoa⁴je³ya³ xi³ nca³ntsjai². 11 Ña³qui³ en¹qui²xi⁴: Tsa² c⁷oa⁴-s⁷in² c⁷en³² ña¹ cao⁴ je², c⁷oa⁴-ti⁴s⁷in² coi⁴yo³choan³² ña¹ cao⁴ je². 12 Tsa² ti¹jcho¹cjoa⁴-na¹ cao⁴ je², c⁷oa⁴-ti⁴s⁷in² coa⁴te²xo³ma³² cao⁴ je². Tsa² c⁷oe¹⁷ma³-le⁴², c⁷oa⁴-ti⁴ je² c⁷oe⁴²ma³-na¹. 13 Tsa² tsi² ma³cjain¹-na¹ nca³ ña¹, to⁴jo³ si¹jnc³ nca³ je². Li²coi³ coan⁴ si⁴²c⁷a³ntjai²ya³ yao³-le⁴.

Nta³ si⁴chjen¹ je² en¹ xi³ cjoa⁴qui²xi⁴

14 Ti⁴cja³⁷ai³tsjen³-lai⁴ je²-vi⁴, t⁷e²ne²-lai⁴ nqui³xcon⁴ Nai³-na¹ nca³ tsi² fao¹ya³-ni³ en¹-ve⁴ xi³ ni⁴to⁴jme³-jin²

chji¹-le⁴. To⁴sa³ si¹sca¹ya³-le⁴ xi³ tjio¹nch⁷oe¹. ¹⁵ Cjai¹nca³
 nta³ ti⁴xi¹ti¹yai³, jme¹-ni³ nca³ coi⁴sen⁴jna³va³sen³-si¹ni³
 nca³ nta³ coi²tjoi⁴ t⁷a³ts⁷e⁴ Ni³na¹, jo³-ni³ jnco³ xi³ si¹xa¹
 xi³ tsi² tsa² jme³ xi³ coan⁴soa³-le⁴ nca³ nta³ si¹chjen¹
 je² en¹ xi³ cjoa⁴qui²xi⁴. ¹⁶ Ti⁴sen⁴xin²-lai⁴ xi³ to⁴xquia⁴
 na⁴jmi¹ xi³ tsi²jme³ chji¹-le⁴ t⁷a³ts⁷e⁴ Ni³na¹. To⁴nqui²sa⁴-
 sa³ cjin³ sca⁴ni² cho⁴ta⁴ nca³ tsi² scoe⁴xcon¹ Ni³na¹. ¹⁷ Je²
 en¹-le⁴ to⁴coai⁴ ca³jna³ jo³-ni³ tsa² jnco³ jtse¹. Himeneo
 cao⁴ Fileto tjio¹j¹in³-le⁴ xi³ c⁷oa⁴cjoan³. ¹⁸ Xin² ntia⁴²
 qui³-le⁴ cjoa⁴qui²xi⁴. Qui³tso² nca³ je² xi³ cjoa⁴⁷a¹ya³-
 le⁴, je³coan³. C⁷oa⁴-s⁷in² si¹sca¹ya³c⁷a³-le⁴ xi³ ma³cjain¹-
 le⁴. ¹⁹ To⁴nca³ je² nca³n⁷ion¹-le⁴ Ni³na¹ jo³ chjao¹ja⁴ma⁴
 xi³ n⁷ion¹ ti¹jna³. Tjin¹-le⁴ je² choa⁴-vi⁴: Je² Nai³-na¹
 ve³ jña³-le⁴ xi³ ts⁷e⁴. Je² nca³ts⁷i³ xi³ nchja⁴ jan³⁷ain¹-le⁴
 Cristo ca²ta³vi³tjo³xin²-le⁴ cjoa⁴ts⁷en⁴. ²⁰ Ya⁴ jnco³ ni³⁷ya³
 xi³ je³, a³li² tsa² tso³jmi² xi³ taon⁴si³ne² taon⁴choa³-jin²
 tjin¹, to⁴nca³ c⁷oa⁴²-ti⁴ tjin¹ xi³ ya¹ xi³ ni³⁷nte³ coan³nta³-
 ni³. C⁷oa⁴-ti⁴s⁷in² tjin¹ c⁷a³ xi³ ⁷ya³xcoan¹ c⁷oa⁴ xi³ tsi²
⁷ya³xcoan¹. ²¹ Tsa² jnco³ xi³ coi³ cjoa⁴ si¹tsje³-ni³ yao³-
 le⁴, c⁷oa⁴cjoan³ jo³-ni³ tsa² cho⁴tsin¹ xi³ ⁷ya³xcoan¹, xi³
 je³coan³tsje³, xi³ coan⁴ coan⁴chjen¹-le⁴ Nai³-na¹, nca³
 ti¹jna³nta³ to⁴jme³ xa¹ xi³ nta³ tjin¹. ²² Ti⁴sen⁴xin²-lai⁴
 cjoa⁴sca¹ya³-le⁴ xti³. C⁷oa⁴-s⁷in² t²in³coai⁴ yao³-li⁴ cao⁴ xi³
 cjoa⁴qui²xi, cao⁴ xi³ ma³cjain¹-na¹, cao⁴ xi³ cjoa⁴tjao²cha³,
 cao⁴ xi³ cjoa⁴nch⁷an¹ta³con², cao⁴ je² cho⁴ta⁴ xi³ nchja⁴-
 le⁴ Nai³-na¹ cao⁴ ni⁴ma⁴ xi³ tsje³. ²³ To⁴nca³ je² xi³
 si¹cjan³⁷a³-ni³ en¹-le⁴ xi¹ncjin¹ xi³ tsi²jme³ chji¹-le⁴, xi³
 tsin²-le⁴ cjoa⁴chji⁴ne⁴-jin², ti²tjo⁴xin²-lai⁴. Je³⁷yai³ nca³
 to⁴cjoa⁴si³ v⁷e¹ts⁷ia⁴. ²⁴ Je² cho⁴⁷nta³-le⁴ Nai³-na¹ a³li²coi³
 ma³chjen¹ nca³ cho⁴ta⁴cjoa⁴si³ coan⁴, to⁴nca³ ma³chjen¹
 nca³ nt⁷e¹ coan⁴ xi³ t⁷a³ts⁷e⁴ nca³ts⁷i³, nca³ ma³-le⁴
 va³co¹ya³, nca³ si¹cjain¹ xi³ ch⁷ao³ si¹cao⁴. ²⁵ Cao⁴ cjoa⁴nta³
 ca²ta³tso²ya³nta³-le⁴ je² xi³ va³tio²ta²ja³-le⁴, tsa² tsjao¹-

sa³le⁴ Ni³na¹ nca³ si⁴²c²a³ntjai²ya³ cjoa⁴fa³²ai³tsjen³-le⁴,
jme¹-ni³ nca³ scoe⁴-ni³ xi³ cjoa⁴qui²xi⁴. ²⁶ C²oa⁴-s⁷in²
coi⁴tjo³xin²-ni³ chen⁴-le⁴ nai⁴² je² xi³ tjio¹n⁷ion¹-le⁴ jo³-
s⁷in² me³-le⁴ nca³ je².

3

Jo³ cjoan³ cho⁴ta⁴ xi³ s⁷e⁴ je² ni⁴čhjin³ xi³ cjoe⁴t⁷a³

¹ Je²-vi⁴ c²oa⁴-ti⁴ ca²ta³⁷yai³ nca³ je² ni⁴čhjin³ xi³
cjoe⁴t⁷a³ cjoa⁴⁷ai¹-na¹ cjoa⁴n⁷ain³ xi³ tse³. ² S⁷e⁴ cho⁴ta⁴ xi³
to⁴yao³-le⁴ tsjoa³que³ coan⁴, xi³ ch⁷ao³ntai³, xi³ nchja⁴t⁷a³
yao³-le⁴, xi³ nc⁷a³con³, xi³ ch⁷ao³ tso²-le⁴ xi¹ncjin¹, xi³
ts⁷a³ntjai²cjoa⁴que³ xi³jcha¹-le⁴, xi³ ni⁴⁷i⁴tse¹-jin² tsjoa¹
cjoa⁴nta³, xi³ tsi² tsje³ tjin¹, ³ xi³ tsin²-le⁴ cjoa⁴tjao²cha³-
jin², xi³ si¹qui³tson¹ en¹-le⁴, xi³ va¹nqui³ cao⁴ cjoa⁴nti³so³,
xi³ to⁴cja⁴⁷ai¹-nca¹ s⁷in¹, xi³ toan¹, xi³ taon³ ve³ xi³ nta³,
⁴ xi³ jao² ncjain¹, xi³ to⁴xquia⁴ s⁷in¹, xi³ to⁴si¹xcon¹ ma³-
le⁴, xi³ nqui²sa⁴ ma³tsjoa³que³ cjoa⁴sca¹ cao⁴-ni³ tsa²
Ni³na¹, ⁵ xi³ ma³tsen³ jo³ xi³ ve³xcon¹ Ni³na¹, to⁴nca³
tjio¹t⁷a³xin²-le⁴ nca³n⁷ion¹-le⁴ Ni³na¹. Je² xo⁴cjoan³-
vi⁴ xi³ ti⁴sen⁴xin²-lai⁴. ⁶ Tjin¹ c²a³ xi³ ts⁷e⁴ je²-vi⁴
xi³ ma³ fa³⁷a³s⁷en³che¹, si¹nt⁷e¹t⁷a³-le⁴ ⁷nti¹ ya¹nchjin¹
xi³ cjai¹nca³ tse³ je¹ y⁷a³, xi³ cja⁴⁷ai¹-sa³ cjoa⁴chi⁴nca⁴
fi²cao⁴ nca³ je², ⁷ xi³ tjio¹co³t⁷a³ya³ntsjai², c²oa⁴ ni⁴c⁷ia³-
jin² ma³-le⁴ cjoa⁴fa³⁷ai³tsjen³ xi³ cjoa⁴qui²xi⁴. ⁸ Jo³-s⁷in²
qui³s⁷in³ Janes cao⁴ Jambres nca³ ña³qui³ tsa³ca³tio²ta²ja³-
le⁴ Moisés, c²oa⁴²-ti⁴ s⁷in¹ je²-vi⁴ nca³ va³tio²ta²ja³-le⁴
xi³ cjoa⁴qui²xi⁴, cho⁴ta⁴ xi³ ch⁷ao³ tjio¹ cjoa⁴fa³⁷ai³tsjen³-
le⁴, xi³ tsi² nta³ ji³tjo³ t⁷a³ts⁷e⁴ en¹ xi³ ma³cjain¹-na¹.
⁹ To⁴nca³ li²jme³ xi³ ti⁴coi⁴njen³-ni³le⁴, nca³ je² cjoa⁴sca¹-
le⁴ jcha⁴-le⁴ nca³ts⁷i³, jo³-s⁷in² tsa³⁷ya³-le⁴ cjoa⁴sca¹-le⁴ xi³
nqui²jao²-ve⁴.

Pablo v⁷e¹ne²-le⁴ Timoteo

10 To⁴nca³ ji³ coan³cho⁴ya³-li² je² cjoa⁴fa³?ai³tsjen³-na⁴, jo³-s⁷in² tsa³ca³co³ya²³-le²³, jo³ qui³s⁷ian³, jme³ xi³ tsa³c⁷a³mjen³ ca²sje³, jo³-s⁷in² coan³cjain¹-na³, jo³-s⁷in² qui³si³-cjen¹³, jo³-s⁷in² coan³tsjoa³que⁴, jo³-s⁷in² qui³cho¹cjoa⁴-na³, 11 jo³-s⁷in² tsa³qui³yo³tjen⁴nqui³co²ntran⁴-na³, jo³-s⁷in² qui³si³cja³?a¹-na³ cjoa⁴ñ⁷ain³, je²-vi⁴ xi³ ja³?ai³ne²-na³ ya⁴ Antioquía, ya⁴ Iconio, ya⁴ Listra. Coi³ cjoa⁴ñ⁷ain³ xi³ tsa³cja³?a³. Nai³-na¹ tsa³c⁷a³sje³ntjai²-na³ nca³yi³je³. 12 C⁷oa⁴ je² nca³ts⁷i³ xi³ me³-le⁴ nca³ tsje³coa⁴tio²con³t⁷a³-le⁴ Cristo Jesús, c⁷oa⁴-ti⁴s⁷in² cjoa⁴?a²cjoa⁴ñ⁷ain³. 13 To⁴nca³ je² cho⁴ta⁴ts⁷en⁴, c⁷oa⁴ je² xi³v⁷a³na⁴cha⁴ to⁴ña³qui³ to⁴sin³ to⁴nta³ nqui²sa⁴-sa³ ts⁷en⁴ coan⁴, c⁷oa⁴na⁴cha⁴-sa³le⁴, c⁷oa⁴-ti⁴ ch⁷a⁴na⁴cha⁴-sa³le⁴. 14 To⁴nca³ ji³ nta³ t⁷in³coai⁴ xi³ qui³cho²t⁷a³yai³, xi³ nta³coan³cjain¹-li², nca³ je³?yai³ ?ya³ xi³ tsa³ca³co¹ya³-li². 15 Sa³?nta³ nca³ ?nti¹ ti³soi³, tsa³?yai³ je² xon⁴ Escritura xi³ ts⁷e⁴ Ni³na¹, je² xi³ nta³ si⁴²chji⁴ne⁴-li² jo³-s⁷in²coi²tjo⁴ntjai²³ xi³ to⁴t⁷a³ts⁷e⁴ nca³ ma³cjain¹-li² t⁷a³ts⁷e⁴ Cristo Jesús. 16 Nca³yi³je³ xon⁴ Escritura Ni³na¹ ji³n³choa³-ni³, c⁷oa⁴ cjai¹nca³ nta³ ma³chjen¹ nca³ va³co¹ya³-na¹, nca³ nchja⁴ti³cao⁴-na¹, nca³ si⁴²cho⁴ya³nta³-na¹, nca³ si⁴²qui³ncha¹ya³ntia⁴²-na¹ xi³ cjoa⁴qui²xi⁴, 17 jme¹-ni³ nca³ je² cho⁴ta⁴-le⁴ Ni³na¹ ña³qui³ tji¹jnc³-si¹ni³, nca³ ña³qui³ tjin¹yi³je³-le⁴ xi³ ma³chjen¹-le⁴ t⁷a³ts⁷e⁴ nca³yi³je³ xa¹ xi³ nta³.

4

1 V⁷e³ne²³-le²³ nqui³xcon⁴ Ni³na¹ cao⁴ Nai³-na¹ Jesucristo xi³ s⁷a⁴ c⁷oe⁴²nta³jjin³-le⁴ xi³ tjio¹con³ cao⁴ xi³ c⁷en³, nca⁴ Jesucristo coan⁴tsen³, cjoa⁴?ai¹ ca³te¹xo³ma³. 2 Ti⁴no²cjoa⁴yai³ en¹-vi⁴, ti⁴xi¹ti¹yai³ nca³ntsjai² ni⁴chjin³, ti⁴cho⁴ya³-lai⁴ ti⁴no²cjoa⁴ti³coai⁴ t⁷e²ne²-lai⁴ cao⁴ nca³yi³je³ cjoa⁴tse³ta³con² cao⁴ cjoa⁴fa³?ai³tsjen³ xi³

c²oin¹ya³-lai⁴. ³ Cjoi⁴cho³ ni⁴χhjin³ nca³ tsi²coi³ si⁴²cjain¹-le⁴ xi³ nta³ cjoa⁴fa³ai³tsjen³, to⁴sa³ c⁷oe⁴²xco¹t⁷a³-le⁴ yao³-le⁴ maestro jo³-s⁷in² me³-le⁴ cjoa⁴chi⁴nca⁴-le⁴, c⁷oa⁴ jo³-s⁷in² nca³ na³sca¹ tso²-le⁴ xo⁴ño³. ⁴ Li²coi³ coi⁴ncha²ño³-le⁴ xi³ cjoa⁴qui²xi⁴, to⁴ya⁴² coai⁴ nčh⁷oe² xi³ to⁴⁷en¹. ⁵ To⁴nca³ ji³ nta³ ti⁴jna³chon³ntai³, ti⁴cjain¹-lai⁴ cjoa⁴ñ⁷ain³, ti⁴xai¹³, ti⁴no²cjoa⁴yai³ t⁷a³ts⁷e⁴ Ni³na¹, ti⁴jncoi³ xa¹-li⁴. ⁶ Je³ti²jna⁴čhian³ cjoa⁴vi³ya³-na⁴, jo³-s⁷in² v⁷ai²t⁷a³ cjoa⁴tjao². Cjai¹nca³ choa³-sa³ ma³ ni⁴χhjin³ nca³ cjoia¹³. ⁷ Nta³ qui³si³toan¹jian³ cjoa⁴jchan¹. Qui³si³jncoa³ xa¹-na⁴. Nta³ qui³si³tjo³son²-nia³ en¹ xi³ ma³cjain¹-na¹. ⁸ Je² xi³ fe³t⁷a³, ti¹jna³tjao²-na³ je² cjoa⁴qui²xi⁴ xi³ jo³-ni³ jnco³ corona, xi³ c⁷ia⁴ ni⁴χhjin³-ve⁴ tsjoa¹-na³ je² Nai³-na¹ xi³ v⁷e¹nta³j³in³ cao⁴ cjoa⁴qui²xi⁴. A³li² tsa² to⁴⁷an³-jian² xi³ tsjoa¹-na³, c⁷oa⁴²-ti⁴ tsjoa¹-le⁴ nca³ts⁷i³ xi³ me³-le⁴ nca³ coan⁴tsen³ nca³ je².

Pablo v⁷e¹ne²-le⁴ cho⁴ta⁴

⁹ Ti⁴xi¹ti¹yai³ nca³ nti⁴ton⁴ nčhoa¹chon³-nai¹³. ¹⁰ Je² Demas qui³tsjion³-na³ nca³ coan³tsjoa³que³ cjoa⁴ xi³ tj¹in¹ nt⁷ai⁴-vi⁴. Qui³ ya⁴ Tesalónica. Crescente qui³ ya⁴ Galacia. Tito qui³ ya⁴ Dalmacia. ¹¹ To⁴je² Lucas xi³ ti¹jna³cao⁴-na³. Chjoai¹³ Marcos, nčhoa¹coai⁴. Cjai¹nca³ coan⁴chjen¹-na³ xi³ t⁷a³ts⁷e⁴ xa¹-vi⁴. ¹² Je² Tíquico qui³sca³nia³ ya⁴ Efeso. ¹³ C⁷ia⁴ nca³ cjo⁴nčhoai³ nčhoa¹coai⁴ je² tso⁴nca⁴ xi³ tsa³c⁷e³jna²³ ya⁴ Troas ya⁴ nt⁷ia³-le⁴ Carpo, cao⁴ xon⁴, ti¹tjon² je² xon⁴čhjoa⁴. ¹⁴ Alejandro je² chji⁴ne⁴qui⁴cha⁴ a³li² to⁴c⁷oa⁴cji³ taon³ tsa³ve³-na³. Je² Nai³-na¹ c⁷oe⁴²chji¹-le⁴ jo³ tso² je¹-le⁴. ¹⁵ C⁷oa⁴-ti⁴ ti⁴coi²ntai⁴ yao³-li⁴ xi³ cao⁴ je². Cjai¹nca³ to⁴ta²ja³ tsa³c⁷e²jna³-le⁴ en¹-na¹. ¹⁶ C⁷ia⁴ nca³ ti¹tjon² qui³nchja²ntje²³ yao³-na⁴ ni⁴to⁴⁷ya³-jin² xi³ tsa³qui³ncha²cao⁴-na³, to⁴sa³ qui³tsjion³-na³ nca³ts⁷i³. A³li² coi²nta⁴-jin² s⁷in¹-le⁴. ¹⁷ To⁴nca³ je² Nai³-na¹

tsa³c²e²jna³cao⁴-na³. Qui³tsjoa³-na³ nca³n⁷ion¹, jme¹-ni³ nca³ to⁴t⁷a³ts⁷an⁴ coan⁴jnc³-si¹ni³ cjoa⁴qui²xi⁴ xi³ qui³nchja²ya³, c⁷oa⁴ jme¹-ni³ nca³ nca³ts⁷i³ cho⁴ta⁴ xi³ li² judío-jin² cjo⁴nč⁷oe¹-si¹ni³. Ji²tjo⁴ntjai²-nia³ ts⁷oa³ xa³.
¹⁸ Je² Nai³-na¹ c⁷oa⁴sje³ntjai²-na³ nca³yi³je³ cjoa⁴ts⁷en⁴, c⁷oa⁴ c⁷oe⁴2tjao²-na³ xi³ t⁷a³ts⁷e⁴ cjoa⁴te¹xo³ma³-le⁴ nc²a². Ca²ta³s⁷e³-le⁴ cjoa⁴je³ya³ nca³ntsjai² nca³ntsjai². C⁷oa⁴ ca²ta³ma³.

Cjoa⁴ni²ti²nta³ xi³ fe³t⁷a³

¹⁹ Ti⁴ti²ntai³ Prisca cao⁴ Aquila cao⁴ nca³ts⁷i³ cho⁴ta⁴ xi³ ts⁷e⁴ nt⁷ia³-le⁴ Onesíforo. ²⁰ Erasto tsa³c²e²jna³ ya⁴ Corinto. Je² Trófimo qui³si³-c⁷e¹jna³ ya⁴ Mileto nca³ ti¹m⁷en³.
²¹ Ti⁴xi¹ti¹yai³ nč⁷hoa¹nti⁴ton⁴-ni³ nca³ cje³ chan⁴nch⁷an¹-jin². Eubulo, cao⁴ Pudente, cao⁴ Lino, cao⁴ Claudia, cao⁴ nts⁷e³2 nca³ts⁷i³ si¹ti²nta³-li². ²² Je² Nai³-na¹ Jesucristo ca²ta³v⁷e²jna³cao⁴ ni⁴ma⁴-li⁴. Cjoa⁴nta³ ca²ta³s⁷e³-no³. C⁷oa⁴ ca²ta³ma³.

Xon⁴-le⁴ ni³na¹ xi³ tʔa³tsʔe⁴ Jesucristo

New Testament in Mazatec, Huautla (MX:mau:Mazatec, Huautla)
copyright © 1960 Wycliffe Bible Translators, Inc.

Language: Mazatec, Huautla

Translation by: Wycliffe Bible Translators, Inc.

Mazateco, Huautla [mau], Mexico

Copyright Information

© 1960, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Huautla

© 1960, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
